

Բարձրունի

Բնակավայրի վարչական ղեկավար՝ Արսեն Ալեքսանյան

Հեռ. +374 77173434

Բարձրունի գյուղը գտնվում է Հայաստանի Հանրապետության Վայոց ձորի մարզի Վայքի տարածաշրջանում, մարզկենտրոնից 41 կմ հարավ-արևելք, Վայոց ձորի լեռների հարավահայաց լանջին: Գյուղը սահմանամերձ բնակավայր է, Երևանից գտնվում է 220 կմ հեռավորության վրա, Վայք քաղաքից հեռավորությունը կազմում է 28 կմ, ծովի մակերևույթից բարձրությունը կազմում է 1950-2050 մ:

Կլիման ձմռանը ցրտաշունչ է ,ամռանը՝ զով: Տարեկան տեղումների քանակը կազմում է 350-400մմ: Բնական լանդշաֆտները կիսաանապատներ են և չոր տափաստաններ, որոնց մի մասը վերամշակվել են՝ վերածվել կուլտուր-ոռոգելի լանդշաֆտների:

Գյուղը հիմնադրվել է 19-րդ դարի սկզբներին, վերաբնակեցվել է 1928 թվականին՝ Արեւմտյան Հայաստանի Խոյ, Սալմաստ գավառներից ներգաղթված հայերով: Սակայն գյուղն ավելի հին է քան ենթադրվում է: Այդ մասին վկայում են <Հին գյուղ> կոչվող տարածքում հայտնաբերված 7-րդ դարով թվագրված խաչքարերը, ինչպես նաև զարդաքարերով, սրբատաշ քարերով կիսավեր կառույցները:

Գյուղի կենսագործունեության գլխավոր ճյուղը գյուղատնտեսությունն է: Կլիման նպաստավոր է այգեգործության, հացահատիկային, կերային մշակաբույսերի աճեցման համար: Մարդիկ զբաղվում են անասնապահությամբ ու մեղվաբուծությամբ: Պահուստային հողերը չեն օգտագործվում սահմանամերձ լինելու պատճառով:

ՀՀ կառավարության կողմից 2002 թվականին հաստատվել է Վայոց ձորի մարզի Բարձրունի գյուղի պատմության և մշակույթի հուշարձանների ցանկը, որում ներառված է 23 հուշարձան: